

四庫全書

集部

欽定四庫全書

家藏集卷二十七

明 吳寬 撰

詩六十六首

春山圖

平野春雨過危峰殊秀發  
玉女洗頭罷端如盤髻髮  
高人攜筇行似畏溪橋滑  
結伴是何時松林間採蕨

送戴員外出守桂林

予有長才早致身仕途隨處是通津六千里外桂林郡  
十五年前杏苑人出守要知從古重作官何幸與民親  
昌黎亦羨登僊去詩裏驂鸞句尚新

送張光祿時達還南京

早入工曹績用成徊翔又作北都行長才未展猶閒地  
畱務能分已列卿言論高來通世故須眉蒼盡好風情  
傷人莫怪南歸速春色遙追到石城

賀成國夫人胡氏七十

畫戟門深翠幙重北堂春酒色初濃江南秀出名臣裔  
天上榮加大國封僊錄載頌人跨鶴海圖親獻客乘龍  
百年將種能供養高廩長盈祿萬鍾

盆中桃花一本而緋碧二色

小圃喜多春色繁花一併斑斑紅霞映水將落白雪當  
牆可攀坐亂老人髻髮行驚醉客容顏二喬臺上連臂  
不數唐家玉環

送王汝英南歸

尺疏陳情入舜宮御批真喜徹重瞳銀臺異寵曾加秩  
金匱奇才屢奏功家食固知千指衆友懷皆說一心同  
銅官山色渾如舊畫錦煌煌在目中

送邵國賢

簿書錢穀歎徒勞提學俄聞出戶曹都下文名如子少  
江西學政是誰高璽書耀日懸霄漢驛舫乘風壓雪濤  
自古賓興先六行不將小技望賢豪

送白太傅致仕

玉敕新承墨未乾都門行色萬人看  
法曹屢奏三年績恩旨重加一品官  
勝地扁舟行樂健故人尊酒過從歡  
不須更入香山去自有西園八節灘

送冢宰屠公致仕

皇朝出入著勤勞未老頭顱有二毛  
遷秩魚聞離憲府收功仍喜在銓曹  
天章笑捧新頒敕晝錦榮披舊賜袍  
更向人間誇至樂登堂日日獻春醪

園中行讀白集

北齋坐後又西軒挾冊休將比兔園每託心情常託物  
已忘官職未忘言吳中故郡荒烟積洛下幽居宿草蕃  
老至一編空在手燕山畱滯媿高騫

新月

新月如少女靜娟凝晚粧亭亭朱樓上隱隱銀漢旁桂  
樹未全長玉兔在何方自然多思致何必滿容光黃昏  
延我坐檐下施胡牀遂爾成良會清風復吹裳願言常  
不負莫學參與商

園中夜步

曳履孤亭側披襟小徑前  
藤垂風獨細樹隱月難圓  
散秩朝非懶閒居病易痊  
老年無著作只擬錄歸田

同年會予以病不赴簡席間諸公

新秋良會禁城西獨坐公堂未得躋  
三客預期非不速  
十人堪歎亦難齊  
情親只託詩筒送體弱誰將藥裹齎  
向晚涼生還坐想不知若箇醉如泥

送工部徐尚書以病乞歸加太子太保致仕



中外勤勞四十年平生晚節更能全身登八座官殊重  
名列三公位獨專救捧龍章天日近衣裁麟角海雲鮮  
肩輿日日何妨出故里看山有宿緣

送禮部徐尚書加太子太保致仕

玉帶橫腰喜氣新賜歸爭看越精神史官早授為前輩  
聖主疇咨念老臣賜谷卜居真有地南宮增秩更何人  
亦知恩重難忘報夜夜山中禮北辰

送倫修撰文序父南還

萬里南來繫一舟  
綠衣春酒動離愁  
魁山黎水雖堪住  
赤縣神州也合游  
晚市緇塵仍觸暑  
月林清影忽驚秋  
朝家恩典三年事  
闕下親承願少留

為毛憲清題花竹圖

憲清有祖百  
歲生於二月

繁花匝地凝春色  
脩竹凌空傲歲寒  
共向生辰呈秀麗  
偏于晚節報平安  
中朝有待賢孫至  
東海須將大老看  
白髮烏紗添入畫  
漢家恩詔定加官

送李世賢赴南京禮部侍郎

史局文場滯此身高才初喜試經綸東朝侍從踰三載  
南省追陪只二人雲起望家虞阜曉花開退食秣陵春  
都門醉別遙揮袂且脫京華眯目塵

題沈良德送行圖

不用高歌陟岵篇賜歸真慰母心懸翟冠自送雙笄總  
綵服重裁兩袖翩九世醫名多積德一門科第總稱賢  
吳中秋到慈闈啓盡說宜將盛事傳

翰林送李世賢

都門無計可畱公況是秋來有便風尚憶陸機游洛下  
莫疑張翰向江東詞林前輩晨星少鄉社無人海月空  
定有天書還召入暫將畱務託南宮

九日風雨二首

滿城風雨重陽日何處重登戲馬臺丹闕入朝衣盡濕

玉堂置酒席難陪

是日翰  
林設宴

牆邊赤棗憐俱落籬下黃花

恨未開安得吳門蓑笠叟芙蓉江上送魚來

滿城風雨重陽日平地江湖大漲時木偶自漂應去遠

麴生不召故來遲  
人間紀事兼詩話  
座上傳神滿髣髴  
何物報晴真可喜  
喳喳鳴鵲在槐枝

早寢

老去貪眠負月華  
不知夜景到秋嘉  
疎簾倚石還搖影  
叢桂遮堂定著花  
吟就挑燈當別館  
夢回搥練是鄰家  
如何七十年將近  
猶踏朝門聽鼓撾

謝葉惟立送菊

園門歲晚只常關  
忽送幽花滿目斑  
天意故教秋色好

世情不使物華閒，臨風酹酒憐人老。  
傍徑編籬，恨地慳。  
賴有疎簷為伴侶，平生高節總難攀。

送陳德修擢南京右都御史

百年京鎬設南臺，門對鍾山紫翠堆。  
畱務遠分承寵命，舊章重整見高才。  
豸冠戴向風前正，鷗舫行從水際開。  
便道過家誰不羨，鄉人爭看錦衣回。

送何道士授都紀還鎮江次沈石田韻

鶴馭雲中來北固，霞裾塵外別東華。  
名題金闕分僊袂，

蹟寄丹山離俗家鴻寶記長當吏牘玄都觀古即公衙  
天寒歸路清如許藤六前驅撒玉砂

藤梢

藤梢繞籬落黃葉照清池屬當秋氣盡欲落已先萎寒  
風既披拂微雪復點之坐見憔悴色不復如前時感之  
重歎息人老良可悲

雪後入朝

天門晴雪映朝冠步澁頻扶白玉闌為語後人須把滑

正憂高處不勝寒  
飢烏隔苑應餐盡  
馴象當庭又踏殘  
莫向都人誇瑞兆  
近郊或恐有袁安

次韻韓貫道送濟之以冬至謁陵

公事驅人更莫辭  
亦知不是翰林時  
同行尚憶匆匆去  
暫別猶勞耿耿思  
百里向前瞻漢廟  
五陵依舊入唐詩  
年來喜識荆南面  
相送惟應少酒卮

謝濟之送橘次舊韻二首

味甘不用兩眉攢  
種得成林合棄官  
食後不將皮核棄



扶衰

闕

僊丹

嘉惠恭承又滿盤牛車雪滑到應難糖囊莫道名非稱  
入齒永漿信不酸

又次韻謝送銀杏

綠葉叢叢鴨脚攢霜前摘取屬園官無花結實猶堪食  
羞殺花王是牡丹

王子纍纍走大盤老人手種食應難閩南橄欖形雖似  
待得回甘已受酸

楊應寧攜畫冊過園居相示已而雪作

園居寂寞掩柴扉詩客從容出禁圍遙聽鶴聲初出迓  
頻瞻馬首莫言歸臨窻看畫忘呼酒據地圍爐試解衣  
寒氣逼人將日暮不知林下雪花飛

聖駕郊壇看牲次王汝韻

天寒迎駕作郊行道院呼僮洗玉觥石鼎不逢狂道士  
銅爐還餉老門生投來濡肉艱無彘雜以枯魚鱖似鯖  
須是石湖風雪夜蓬窻吹火叙同盟

生日

人皆遇除夕我復臨生朝舉頭望七十前去三載遙信  
哉百年內行步為下橋早衰視茫茫面髮且蕭蕭安能  
如松栢歲寒還後凋衰頹固老態加以病相撓但勝陌  
上花易逐風沙飄所愧職業曠難免素餐嘲清秩徒魚  
授黃金自橫腰盤南開別業舊約負漁樵更念丘壠隔  
悲愴尤無聊孤燈對卧榻轉展至中宵

談命

有客能談命言予運正通運通亦何事爵位當日崇客  
言與吾意所見頗不同凡今登仕者命服華其躬人徒  
見其美

幽

入朝恒惴惴臨事惟忡忡官秩久

益進職業愈難供王法或幸免清議安能容一朝奉身  
退憂患頓若空超朝謝車馬睡足日頭紅田園日以涉  
山水任所窮出門無禁制開口無災凶樂哉難具述林  
下始收功吾生果有命歸去在吳中

正月十三夜與鄉友會飲

繞簷星月帶明河佳節相逢宵易過合郡幾人常減少  
流年如我獨加多畫屏重展銷銀蠟春酒爭持蕩碧波  
正是金吾初弛禁下堂休問夜如何

十五夜赴西涯飲

浙燈光起透藤絲偏與西堂雪月宜故事上元初放假  
新年三日預為期老人正爾思吳俗童子何堪唱楚詞  
醉後再傾紅粟酒情深渾忘出門遲

次韻李諭德生子志喜

紫禁朝回步雪中傳聞吉語信非空懸弧在戶彎如月  
挂綵當筵爛若虹上日邀賓須歲滿中年為父宜途窮  
李年五十四如何識此真堪喜我憶平生事頗同

為錢副郎世恩題桂兔圖

懸崖碧樹爭倒垂金釵亂挿還參差古香能受秋風吹  
亦復有藤縷絡之洞門一似逢僊姬身纏寶璫墜朱綫  
其下何物趺坐危赤睛玉毫光陸離長耳聳起分兩岐  
視而孕焉醜是兒惟上有物揚清暉團團永鏡一尺圍

人名為月非此誰月中桂滿兔且肥信哉有影乃在斯  
歷觀畫記從新施收藏莫盛宣和時高格雅淡今何稀  
黃筌趙昌曷不師素面朝天誇號姨市娼塗抹衆所嗤  
驀然展觀亦甚奇翩翩五色斑斕衣

傳水部索題石田玉洞桃花圖寄壽乃兄宗伯  
傳說騎箕上天去傳巖子今在何處翠倚西江千仞高  
玉筍山前子孫住一溪流水漱雲根萬樹桃花遮洞門  
胡麻飯逐落紅亂宛然此地武陵村主人自是青雲器

去作玉皇香案吏不須手拍洪崖肩水部郎官是難弟  
勞書寄語中山人少遲歸來三百春妙手誰能移壽域  
分明只在人間世

盆中紅梅二首

盜裏孤根強屈蟠低枝老硬欲凌寒不隨桃杏供人目  
顏色生來自渥丹

坐見荒園二月過莫瞻春色在喬柯分明一段江南景  
日暮頻將老眼摩



送汪太守致仕

吳學猶傳舊教條  
南來別駕路何遙  
上章忽入新闕報  
增秩仍為大府僚  
老去烏紗常在首  
閒來金帶已橫腰  
人生止足誰知得  
鄉里高名豈自邀

送楊太卿應寧赴南京

太卿樓船向何處  
直到石頭城下住  
江上人迎訪故廬  
堂前我憶瞻嘉樹  
南人只愛江南行  
江南樂多無宦情  
何如去家只百里  
黃金橫帶為清鄉  
老我平生忝知己

不得相從附船尾客居初沾燕子泥官河忽漲桃花水  
金陵本是帝王州高臺依舊鳳凰游知君到日好詩興  
佳句從今無李侯

齒痛

日者齒病作病起吾莫知知之亦甚易年老理固宜憶  
當七八歲正值毀齒時齒落乃復生如草薶即滋今勢  
且欲落既落生無期又如枯樹然安能發新枝落亦不  
自愛獨何以痛為使彼無所痛盡落奚足悲夫豈若韓

子計歲以數之何況舌自存而復食無虧吟聲雖函胡  
尚可和吹簾食物雖齟齬尚不廢含飴但使痛除去此  
外不求醫

輓毛伏澐

早持一劒策奇勲忠勇平生亦罕聞象應星辰通上將  
氣驅貔虎冠三軍捐軀報國懷方略進爵酬勞著誥文  
當寧只今勞北顧誰令頗收起丘墳

送史引之知隨州

儒者之餘事續言以為文古人嘗有言文章能潤身君  
昔在閭里誦習殊精勤浮俗志莫奪翩然曳儒紳稍長  
取鄉貢謙抑愈恂恂蹉跎二十年賢名只如新昨欲就  
常選懶看曲江春同輩爭勸留顏色自欣欣入仕非一  
路期以澤吾民我志乃在此科甲真淺論銓試出緒餘  
冀馬竟空羣楚邦非險遠民風更清淳宋賢讀書處遺  
蹟想應存此地初為守平生志方伸三年成美政吾老  
猶當聞

送馬學士良佐還南京

院事清閒不下堂，手披竹簡置銅章。  
虞廷初考為三載，馬氏重聞有五常。  
官到鎬京諳典故，地通岷水接家鄉。  
南風又引扁舟去，一振塵衣上鳳岡。

送宋郎中出守廣信

水部才名滿數車，向來相識自京華。  
雲間接壤為鄰郡，江右分符得過家。  
旌旆微沾秋野雪，桅檣高入晚汀霞。  
親民長策今須展，故里誰將畫錦誇。

園居二首

朝回當暑寫衣輕影過清池浴鳥驚種得玉延纔出土  
客來何物可為羹

靜處誰兼吏隱名名兼况有老儒生却憐一畝幽棲地  
百里吳山不曾行

追和朱樂圃先生蘇學士題

泮池

半形循學舍一水轉松林盛矣來多士依然廣德心跨

橋方覺閣垂釣不知深此地名龍腦揚波願作霖

玲瓏石

奇特非常品來從建學前久為錢氏物中有洞庭天輕  
比濱浮磬溫須玉出煙菱溪何足記想見狀頑然

百榦黃楊

嚴凝霜雪後蕃衍弟兄同帖莫題青李刀難斷寸葱厄  
多逢歲閏材短謝良工桃李紛如許終看立下風

公堂槐

密葉連街上孤根寄學中名揚蘇子記陰覆魯侯宮既  
久今何在惟喬自不同曾沾時雨化多幸遇朱公

辛夷

一名木筆

莊周稱散木形狀獨離奇名在誰多識花開每及時鳥  
窺無可食虫蝕也須醫作筆應全誤紛紛落斫池

石楠

泮水根常漑臨池路不遙顧瞻依曲檻愛護障輕綃別  
種為交讓

香楠為交讓木

終年亦後凋有材非爨用斤斧免山



樵

多榦栢

新甫傳遺種吳門見後昆  
碧霄多直榦黃壤本同根  
霜雪持高節莓苔接古痕  
三年非榦木十畝自陰繁

竝秀檜

講堂前竝立霜雪傲玄冥  
此樹今猶在常年不改青  
雨來添秀色風動散微馨  
科第能相繼題名下有亭

新杉

生為松栢類不逐歲寒凋  
弱質蒙春雨高情薄紫霄  
諸生沾賸馥巧匠待長條  
此日材當大初裁自宋朝

泮山

少小游歌地升堂步未窮  
移山元費力覆簣竟成功  
狹徑埋芳草孤亭納暑風  
登高誇壯麗興學念文翁

蘇自家有學景祐初范文正公來典鄉郡延安定胡  
先生為師繼之者為樂圃朱先生公既名臣二先生  
又良師皆一時人才造就遂盛于天下學故吳越錢

氏南園也規制宏壯遠去市井山水之勝嘉樹奇石錯植其間宛然林壑也舊有十題曰泮池玲瓏石百榦黃楊公堂槐辛夷石楠龍頭檜蘄水檜昂足松雙桐至樂園掌教時已亡其四先生乃益以多榦栢竝秀檜新杉泮山而十題復完今去當時已數百年獨泮池泮山尚在而講堂前二檜疑即竝秀若奇石固有不知其孰為玲瓏也寬為童子入學固不知十題之名獨見國朝士大夫詠學中諸景詩石刻然皆非

十題之舊矣比寬自在都再入翰林專掌誥敕暇日  
得閱秘書而樂圃集在焉見十題之作而先生自叙  
其前尤詳乃悉次其韻一過夫今之學遭賢郡守屢  
加興修規制益勝然所謂諸景又亡其三四矣況數  
百年以前者乎故既和其詩復序其事庶其物雖亡  
而其名猶存後世亦有考焉爾辛酉五月既望序

為崔太卿題史都憲墨竹

容臺有地堪種竹北土高寒數根足未許長竿可釣魚

沉云美筍能燒肉太卿好竹如好僊夜夢時時游渭川  
醉來忽見竹滿壁墨痕濕處何蒼然彷彿庭前秋月白  
影落旁枝猶百尺化龍只恐起清波棲鳳却疑依巨石  
人間酷暑何時徂對此條然暑氣無伊誰能事寫此圖  
人云中臺史大夫

為錢僉憲題二士圖


二翁吾不知為誰晚來共坐崖石危一翁攘臂方談詩  
一翁抱膝如有思平湖萬頃渺風漪隔岸蒼山脚下垂

巖姿樹色望忽斷正是白雲初起時吳中山水正如此  
震澤洞庭天下奇更教此地看明月萬鍾千駟將何為  
我欲徒步往從之只恐二翁嫌我是俗客塵衣不使汙  
崖石

題石田畫卷寄沈時陽

松林畫靜人獨行隔林似聽吾伊聲春山滿眼發蒼潤  
知是曉來初雨晴南望荆溪溪上路路繞長松千萬樹  
太湖蕩漾映高門此是荆溪長往處何人能棄冠裳歸

只向松陰覓詩句便欲從之未有期清夢時時此中去  
石田高士卧東林故寫長圖慰我心封題却附湖船上  
只恐雲深無處尋



家藏集卷二十七

欽定四庫全書

集部

家藏集卷二十八

詳校官中書<sub>臣</sub>賈 鏊

中書<sub>臣</sub>劉源溥覆勘

總校官進士<sub>臣</sub>楊懋珩

校對官主事<sub>臣</sub>張 培

謄錄監生<sub>臣</sub>張永浙



欽定四庫全書

家藏集卷二十八

明 吳寬 撰

詩八十七首

題謝鳴治歸來園

三畝新開山下園，古村纔得數家存。經心勞止多閒事，

遺腹蘄然有長孫。栗里一尊常自滿，陶淵明作歸去來 晁家千

首更須溫。晁以道號歸來子有濟北集 主人莫作終焉計，召命臨門

敢負恩

次前韻懷故園

老夫亦自有東園因賦歸來若目存久負木鐃歌杜子  
何妨布被笑公孫別來漸覺清風遠坐處常思白石溫  
便逐秋波放舟去時人莫漫笑忘恩

鳴治新修國學朝房雨夜宿此有作次韻

笑揮公帑百金餘輪奐驚看勝舊居一日算來猶故事  
兩山占斷豈吾廬

鳴治家有  
兩山書院

夜中風雨題詩滿天上星

河待漏初廣廈仍思庇寒士先生才調未全疎

久借內閣朝房次前韻

詞林再入歲周餘自笑東房久借居漢代雖多閱祿秩  
吳門幸有舊田廬高眠齋榻春回後慣着朝衣日出初  
天念老人仍借景隔牆嘉樹綠扶疎

寄壽太宰尹公八十

有序

恭惟太宰尹公天下達尊濟南遺老寬辱愛  
頗久奉問獨疎徒因微末之嫌恐致率易之

誚幸三朝之耆舊功業既成屬八袞之高年  
體履益勝聊陳韻語因寄下懷敬祝期頤以

慰衆望

廊廟久違思舊德山林何幸著名卿臨湖對月將杯舉  
出郭看花却杖行楊綰在朝風俗美山濤典選品流清  
濟南耆俊從來有坐見高年過伏生

盆荷初開適值風雨對之感歎

一面紅粧擁翠盤風風雨雨不勝寒園門半掩無人到

我獨憐渠只自看

代荷花答

淡紅數瓣出天然根託盆池強自連風雨滿園香更遠  
無人來看不須憐

園中即景二首

竹陰日暮意悠然山石依依共晚年白槿數枝相映好  
似將顏色弄清妍

萍藻多從雨後生綠波常共小池平朱藤覆滿休輕剪

待看繁花映水明

雨後移竹

人言種竹須雨過何況移來雨仍大此君此日綰吾家  
攜酒客來爭作賀早年憶與竹相親到此頻栽凡百箇  
晨澆暮灌常不活猶怪園丁何懶惰其密如簣今兩叢  
東鄰分得肩難荷長鑱依然白木柄手種任為泥所澆  
虛亭掩映翠色新使我對之終日坐簷前有地繞丈餘  
覆以清陰誰敢唾尋常豈乏涼颼生日午風清俄遠播

歐公曾云涼竹簟酷暑可逃當此卧頗似吳中顧辟疆  
獨許獻之登上座望塵不作金谷趨高節應甘首陽餓  
平生何故取於斯正為冰霜莫能挫京都百物皆有之  
自笑當居此奇貨敲門只恐人借看林下蒼苔輕踏破  
從今草木俱等閒當以竹題為日課試將竹榜揭園居  
客到先將此篇和

園北新構板屋制甚樸陋濟之有作次韻答之  
古詩載板屋遺制千載下嗟我同心人在其是誰者江

南想猶無都下知更寡匠巧免刻楹童頑難毀瓦中虛  
亦生白外美聊飾赭夜宿惟僊禽朝奔無野馬葦席平  
可眠荆墩矮宜坐緣木構關巢避風停艣舸困疑乃  
倉渠渠愧非夏雨漏痕在壁月窺光落竿仍勞詩家詠  
不待畫工寫其如功省何從此價增也

濟之再和復次韻

退食初自公我常在其下凡此連牆居孰是無椽者價  
直既甚廉規模亦殊寡成風勞運斤禦雨謝陶瓦農家



費索綯甲第自塗赭似巢宜借鳩非厩休畜馬打頭忽  
欠伸結趺從起坐車停難傾蓋柁捩莫旋舸向陽緣度  
冬當暑却忘夏負暄兼看書臨水還洗竿倘有王維來  
當為魏野寫景勝實類之言大非誇也

濟之三和復次韻

古人為宮室棟上而宇下異哉方舟如吾豈作俑者萬  
間與一廛勿復論多寡暖日忽上階烈風免飄瓦維此  
湘山材曾遭始皇赭公來價十倍伯樂同相馬舉杯更

相屬試說再延坐敝巷舊得名居民業折軀近市物預  
儲爰自去年夏辛勤始有此豈易陳一竿病體強棲遲  
中抱聊自寫襟陋何足誇前言真戲也

偶閱白集有東園玩菊之作今歲小園菊開頗  
盛輒復次韻

今歲置秋閨又見秋將闌客居貯秋色幸復有東園凡  
今百種花孰不畏天寒胡此爛斑者節去猶未殘瓦盆  
圍板屋每坐于其間玉毬既高墜金錢更相連東籬偶

采菊不為花所牽，豈如陶翁高見山。獨悠然，我欲學此翁。無菊非所難，翁如欲學我，無酒却鮮歡。園有松與竹，秀色同新鮮。呼之作三友，庶以怡衰顏。

有感效白體

吾秩殊不卑，已作三品官。吾壽亦不少，已望七十年。官卑何足計，壽少真可憐。不見一達者，軀幹如丘山。昨朝猶啖肉，今夕俄奄然。官高亦何用，有壽差直錢。從此心所願，仰面惟籲天。官乞常落後，壽乞常向前。更乞早還。

鄉不待步履艱放舟日臨水策杖日登山筋力幸強健  
何必駕高轅此願如我遂俸祿皆等閒

雪中對竹

平生此君子夙好似相敦昨乘暑雨過移種向東園衆  
木經秋落黃葉亦無存獨此瘦骨爾日午陰猶繁天公  
故歷試夜來雪翻翻雪落洗其葉雪消溉其根顏色愈  
覺好青青映園門高節默自持難與俗人言

板屋二適

負暄

朝坐見日升夕坐見日落午坐日更多煖氣如火灼陋  
居類田家不省在城郭高樹凡數株黃葉被霜摺何曾  
遮陽烏更復聚寒雀旁不啓窻扉前不垂帳幕炙背真  
可獻此語非善謔昌黎却避景遷坐身屨作我幸無此  
勞竟日不展脚自我有此居綿裘不重着自我有此居  
火爐但高閣冬日何可愛可愛更可樂

對雪

大方本無隅虛室自生白吾屋初落成老莊言不易白  
也從何生有物皚皚積空園何所見怪石惟露脊誰寫  
偃竹圖須帶鶴在側平鋪得奇觀寒氣亦漸逼展席坐  
稍深蒲團閣雙腋旁無一木支上止片板隔端愁厚將  
壓却喜輕似擲階踏鳳沼詩案堆兔園策鄙性自不飲  
泥甕久不圻淨掃但烹茶此樂更甚適

送陸全卿赴浙江副使

豸角冠高映赤墀衆中才操許誰知人登臺省誇何易

子去江湖恨不遲親舍相望遙色養臬司爭喜覩風儀  
春來獨覺門牆冷老大空搔兩髻絲

送羅編修擢南監司業

舟引薰風好算程江頭立候總諸生一章再補賢闕缺  
六館先期士類成路入石城瞻虎踞山臨壁水聽鷄鳴  
曾聞南國游歌慣不厭長街振鐸聲

答鳴治乞花二首

北牖新開忽好竒庭中草木最相宜誰知小圃春風後

只有醑醺三兩枝

池上朱藤總着花飛垂繞屋類蜂衙何如枉却公來賞  
況有新醕不用賒

再答鳴治乞花不得二首

新暑蒸人屬夏初恨無花送強分疏朝來北牖多生意  
想見庭前草不除

城北相望見面遲只將新句乞花枝花枝乞得成何用  
自是堯夫要作詩



待鳴治過園居

西街何處踏黃沙  
未午空驚樹影斜  
掃地頻教除短徑  
臨風獨坐數飛花  
行來雙闕應相近  
望入羣山幸不遮  
自笑貧居無款曲  
只呼童子預烹茶

鳴治至次前韻

空庭雨後少塵沙  
委巷迢迢轍蹟斜  
休沐有期能致客  
借看何處更移花  
綠陰覆地禽相語  
清水盈池樹半遮  
四月江南無使到  
宿醅聊可當新茶

送吳克溫赴南京翰林

綸閣花香日影浮  
薦章爭喜得名流  
虞書初進東宮講  
唐典猶從北館修  
家慶及時開壽域  
官清盡日在瀛洲  
安能便趁僊舟去  
南望金陵是舊游

聞家園樹為去歲風雪凍死

我家冬青樹百株  
先子手種東莊上  
年深鬱鬱文餘高  
能與東莊作屏障  
我家木犀樹兩株  
亦復團團高丈餘  
少時我種東園裏  
猶憶此地稱山居  
嘉樹我生好怡悅

家僮寄書來報說園林遭厄家家同去歲何期大風雪  
冬青根遠猶且瘁木犀葉落仍不發其餘橘柚與篁竹  
畏冷固宜難盡活吳中三月春已殘生意蕭條如十月  
嗟哉氣候何如斯老人自言未見之樹埋厚土裹以皮  
凍死尚作枯柴枝東南民力盡徭役無衣無褐死可知  
安得麤布數萬疋盡為此輩遮羸肌傷心偶賦凍樹詩  
詩成敢告良有司

得仲山德州所發書云去京師陸行只三程恨

不能一見是夜園居對月悵然成詠

使車停處發郵筒消息年來喜易通足馬三程歧路近  
兩人千里月明同園名屢易常為主酒量難添已作翁  
信是無由能縮地歸歟須約故山中

園居續詠

藤障

步當斜徑綠成圍賴有長藤葉不稀不恨刺藤枯朽盡  
向來行處慣鈎衣

花門

新開小徑傍西垣  
手種酴醾花已繁  
不似陶翁園日涉  
門雖設處却開門

榆籬

不勞細竹倩人編  
亂插榆秧犬莫穿  
坐待兒童爭采食  
高枝春盡欲生錢

草徑

翠繁綠縹不知名  
石甃中分一徑行  
行處莫言人蹟少

青苔踏破不曾生

藤屏

長條抽綠綴紅雲  
園子新從雨後分  
板屋向南將樹塞  
莫譏管氏儼邦君

樹屋

疑疑光浮葉蔽空  
舉頭惟有碧雲蒙  
夜來雨漏牽蘿補  
巧者安能復食功

晝聞鬼車

五月二十七  
日陰雨中

古燕氣候異陰雨近何多惡鳥啾啾鳴高飛形么麼夜  
鳴已可怪畫出當如何爾亦宜虛出出必事無他鵲鵲  
載常棣鳳凰見卷阿歐公詠鬼車可作安可歌之人亦  
慕此將謂是駕鵲獲之可以獻野外欲張羅

送李郎中推應天府丞

名堂嘗辭傳奉  
之命故有此推

清班綴立色無慚工署徊翔意自堪名屬山公終啓事  
身從韓子不臺參舊開輔郡依江左遙望神京傍斗南  
壯歲要知功業盛看君黑髮正勝簪

自六月初七夜乘涼看月後每夜有月輒賦一

首

此夜看新月亭亭正向西  
光因藤蔓少影與竹梢低  
千里誰同賞三更我再題  
明年相見處約在越來溪

初八夜

此夜仍看月清光稍覺多  
兔毫纔閃爍桂樹漸婆娑  
還傍西樓隱應徙北闕過  
坐來貪看久更問夜如何

初九夜



此夜仍看月人云是上弦形弓三尺直青鏡一規圓光  
借無全日疆分宜半天幽都近遼海始覺地形偏

初十夜

此夜仍看月陰雲未撥開還教童子侍如待故人來多  
病須靈藥常醒只耻疊清光不相負依舊滿書臺

十一夜

此夜仍看月黃昏始正中樹多增目睫天濶蕩心胸暗  
室明於晝銀河淡若空爽然消暑氣身到廣寒宮

十二夜

此夜仍看月胡牀坐稍偏清風還共至良夜未須眠庭際懷丹桂池中見白蓮平生無所好對此輒欣然

十四夜

此夜仍看月看時却向東影懸真載魄光暈類重瞳偶值青林缺還當玉宇空何須論詩識范老句偏工

十五夜

此夜仍看月真從海上生金盤承露濕玉鑑掃塵清詩

句憑誰和菴居為此名人心當自識天道豈常盈

三姊壽七十以八月十三日生因題月兔圖奉

賀

橋頭水滿月流輝設悅高堂映綠衣節賀中秋今已近

壽期百歲古尤稀門闌舊傍金獅壯

宅在金獅巷口

圖畫新成

玉兔肥小弟相看俱老矣願為煮粥正懷歸

為陳玉汝題啓南山水大幅

馬家作畫纔一角刺水殘山氣蕭索畫苑馳名直至今

輸與毫端不浮弱此幅壯哉誰寫真吳西山水見全身  
行春橋上曾遙望待樂亭中好細論

鳴治種荷無花見予所種亦同有作次韻三首  
幸免花開重賞花近來多病早休衙高荷亦自知人意  
盆底移花過別家

翠蓋亭亭已早枯紅衣點點定西湖試看一勺盆池水  
此日無花也合無

野花次第隔籬開不待園丁着意栽莫向瀟溪論氣韻

還輸康節識根荄

老病二首

七十嗟無幾，難教病不生。  
已孤君相意，莫慰友朋情。  
晝寢安逃罪，朝吟入絕聲。  
吾衰忽如此，更苦入朝行。

數日冠裳解，依然一老生。  
看花無目力，養鶴少心情。  
夜月勞延坐，秋風感作聲。  
近來添老景，腰痛況難行。

奕姪構二亭于東莊，一在振衣岡，名看雲；一在曲池旁，名臨渚，以書來報，待余歸休，與諸老同。

游喜而寄此

爾父西菴扁拙修當年種樹帶平疇近聞肯構為吾計  
有待歸休與客游山上看雲依鶴峒園中臨渚對桑洲  
只憂步履非輕健更欲池邊置小舟

病卧王延亭

高卧真如隱士閒病來受用未為慳平池積水從消長  
盡日清風自往還短杖好扶宜野步小冠初著稱衰顏  
直須歸到吳城下新構幽亭況雨間

謝朱懋恭同年寄龍井茶

諫議書來印不斜，忽驚入手是春芽。  
惜無一斛虎丘水，煮盡二斤龍井茶。  
顧渚品高知己退，建溪名重恐難加。  
飲餘為此公清苦，風味依然在齒牙。

題墨竹贈李尚書時雍赴南京二首

司空德望重同袍，直自黃門到戶曹。  
總道南都優老地，更看晚節傲霜高。

三十餘年契義心，白頭相與戴朝簪。  
南行翻喜清風近，

來歲吳門候好音

王延亭晚坐

殘暑酷憐何處同  
只將河朔比江東  
半規新月未全白  
一穗幽花仍澹紅  
鶴步臨池應愛水  
蜩鳴抱木似呼風  
客來只勸秋涼出  
無病無官宜邵翁

惜月效白體

入夜見何物  
既圓且復平  
空懸無所繫  
忽從東海生  
以彼比金盆  
金盆無此明  
以彼比寶鏡  
寶鏡無此清  
所恨



容易缺每憂不常盈況復當盈時或不值天晴又為日  
薄蝕仍被雲縱橫陰晦時每多清明能幾更所以尤愛  
惜對此難忘情我欲告上天高高鑒微誠天有日與月  
譬如兩目晴使夜或無此天目一已盲盡掃諸浮翳一  
旦驅天兵不論晦朔夜常從天上行當令仰見者無不  
騰歡聲

有感

唧唧蛩鳴夜喔喔鷄鳴旦惕然發深省二物如相喚茫

茫開闢來一元過強半人身與浮沉世道分治亂吾生  
處其間一息真可歎寸心冀無忤此外奚足算

送張濟民擢知思南

豫章已作甘棠詠潞渚初從貴竹行萬里思南稱上郡  
寸心拱北望神京緋袍金帶娛慈母阜蓋朱旛候遠氓  
他日漢家循吏傳虛名應不比王成

新製方竹杖

紫玉新裁恰過肩斑斑四面帶湘煙病軀藉爾能扶直

巧手煩渠莫削圓  
世事固知方則止  
時人應道曲能全  
此生得免模稜誚  
晚節相依尚挺然

夜坐聞砧

何處疎砧隔短牆  
東鄰有婦搗衣裳  
風林落葉秋聲動  
露草鳴蛩夜氣涼  
久別官寮忘館閣  
每從兒子話家鄉  
強扶筇竹歸深院  
半壁殘燈獨上牀

中秋風雨

都人期賞月  
此夜合家歡  
市上人爭送  
豆瓜堆滿盤  
那

知風雨至失却此團團天公亦戲人人情苦多端陰晴  
詎可定感此發長歎

和石田題王濬之畫扇二首

尺圖宛見狄溪春我昔經行記得真欲作畫評重閣筆  
只今還屬當行人

紫藤花落石臺春隱者幽居寫最真畫品平生應自定  
何須延譽待他人

病中讀周益公集以術家謂其身坐磨蝎宮宜

退不宜進寬命與公偶同所愧名賢德望不及  
遠甚其退尤宜因詩紀之二首

術家早已論身官淺薄安能比益公止豈人為當有命  
退如時序況無功過徙却愧高車滿請乞惟憂短疏空  
忽報南方風雨甚病懷猶自望年豐

益公論命居磨蝎歐子作詩思潁州合志不須分後學  
乞身將復顧先憂買田負郭甘供稅種樹臨溪擬泊舟  
更欲范村徙一老月中常作石湖游

詠荆墩

錯節盤根地底埋  
野人發地作枯柴  
製來礪碗俄登席  
送到蹢躅忽上階  
曲几異形休用斬  
胡牀同類亦教排  
識荆已遂平生願  
隅坐相依稱小齋

詠胡牀

座上斜撐三尺牀  
病軀隨意與低昂  
睡來有枕還成夢  
不用烏皮作隱囊

煮栗粥

腰痛人言食粟強齒牙誰信粟尤妨慢熬細切和新米  
即是前人栗粥方

讀韓文公瀧吏詩

自古東吳游宦鄉愁聽瀧吏比潮陽蘇公亦是南遷者  
長作嶺南人不妨

招曹良金飯

曹君屢憂患顏色何欣如學道想有得委命心常舒屬  
以公事至翛然寄僧居行裝止詩卷一僕身與俱西城

隔風雨遙念夜堂虛自剔長明燈開函看佛書寒子負  
老病秋至歎歸與坐上無清言何人能慰予明須就我  
飯已摘園中蔬

題墨竹贈良金還東昌

此日此君何所往聊城聊避洛京塵清風到處難移節  
好雨來時更潤身

九月十八日大雪又十日雪益大作秋雪歎

吾生本江南不慣見秋雪見之自北都都人亦不說初



偕雨兼零忽逐風急刮漸看瓦溝平仍畏石城滑陡然  
作寒威貧家孰難活米炭幾時儲齏鹽何處幹以至裹  
曲身況也無衣褐病體強自支憂世亦頗切茲事已兩  
見決旬未遼濶月令不深考政事何所缺惟天量有容  
陽氣終奮發赤日中天行窮簷徧昭晰涼颼只淒然勿  
遽變凜冽霏霏嘉瑞成却待嘉平節

次韻濟之齋居苦雨

病卧三月餘幽憂滿懷積索居當杪秋更為雨聲迫淙

淙瀉空階宜但作點滴緬懷同心人恨不坐連席齋居  
掩公署紀異稽史籍向來明月共數步東巷隔及此遙  
相望南箕與東壁寄示苦雨篇此意吾已識黃葉濕還  
飛穿窻破愁寂

韓貫道示所和復次韻答之

宿禽噤無語落葉紛欲積入夜雨不休愁思為促迫作  
詩寫幽懷累幅空研滴嗟公久鰥居所恨誰暖席夜長  
如僧齋名但挂朝籍坐念西署清遙如千里隔關風仍

送雨夢覺聲撼壁垂頭坐牀下童子何知識八荒同一  
雲杜老感幽寂

送楊溫甫郎中出守杭州

刑曹已脫簿書忙劇郡新除又古杭雪後遠郊驅五馬  
川中名族數諸楊白公石在官初滿蘇子堤成姓共長  
莫信一麾俄出守前賢遺愛自黃堂

竹田東莊諸景中之一也長姪奎取以為號使  
來請一言予喜其不忘舊業也賦近體一章遺

之

斷橋流水接村墟中有脩篁一畝餘附郭久為先世業  
築場宜共此君居斲萌不斷畱嘉種結實能收助宿儲  
幸免輸租同歲晚子孫常願把犁鉏

杜東原畫為齋姪題

溪上悠悠西日沉炊煙生處萬山陰試看畫筆隨人老

此幅吳中何處尋

東原有私印  
曰筆隨人老

又為題沈石田畫

高峰玉立勢亭亭石罅長松數寸青儒雅堂中還講業  
案頭終日對遺經

憂太常墨竹卷為楊郎中題

友石山人去不還派傳墨竹在崑山長身迥出雲煙外  
疎影平分水石間管列笙竽陳雅樂聲回環珮入清班  
此君此日常相見種處徙今手可攀

紀賜

十一月八日東宮輟講內出衣帶徧賜宮  
寮皆加一等寬得雲鶴衣三犀帶一愧感

之餘以  
詩記之

中官高捧出彤闈詔賜官寮帶與衣雲鶴豈勝彎背着  
花犀仍向病腰圍受來臣職將何補持出君恩不可違  
章服在躬元不稱平生加等復何祈

楊惟立以南京吏部考績至京畱修會典書成  
觀卷首與予聯名有詩志喜次韻答之

令甲紛然合百司校讐何幸得同時北門再作冠裳會  
東觀常將筆研隨漢祖三章垂約法唐人六典費精思  
煌煌一帶新編上名在盧前愧莫辭

又次韻惟立奉天殿進會典

時十二月十一日

綳帙裝成進御初，綵輿仙樂下東除。  
史家未許依唐典，冊府空聞紀宋書。  
陞楯夾陳雲氣繞，殿簾高捲日華舒。  
子雲筆底多清興，欲和新篇恨不如。

又次韻進會典明日賜宴禮部

喜動龍顏覩巨編，禮曹開宴特傳宣。  
祖宗政令侔三代，文武公卿合一筵。  
遷史僅終天漢事，周詩宜有鹿鳴篇。  
玉堂歲莫多嘉話，烏帽官花席更聯。

次韻鳴治歲暮有感

石湖住近萬株梅，買得湖田苦未回。  
都市每驚風俗改，老人偏覺歲時催。  
客居顧我聊兼隱，仕路憐渠更用媒。  
頭白相看知已在，方山屹立勢難頽。

家藏集卷二十八



欽定四庫全書

家藏集卷二十九

明 吳寬 撰

詩三十七首

癸亥正月九日以張廷式工部自易州分司來  
初作同年會于李時器宅時器出松竹梅于盃  
云歲寒三友人各以一物自擬復相倡和

京國重臨十日春同年寥落是壬辰合成松竹梅三友

歷盡冰霜雪一身談劇欲更庭下僕飲餘不醉座中人  
白頭却歎吾偏老坐對杯盤意轉親

三人皆不飲

十四日再會予家

雅會新年喜再成過門冠蓋見交情深穿委巷春風暖  
高出疎林海月清唐國太康原有戒齊人同好不重盟  
歲寒高節真堪取三友相看有負名

二十日三會廷式公館館即楊文敏公朝房所  
謂聚奎堂也

積雪全消春載陽上元已過日初長城中燈假何妨滿  
社裏詩盟不可忘三友自成間喜宴五星猶仰聚奎堂  
明朝易水遙相望強向筵前更舉觴

擬松

朽株千尺傍林臯縱受寒風不怒號老去竹梅長作伴  
春來桃李獨分曹材充清廟難為棟賦就中山且作醪  
今日會中邀入會百年高節願同高

和廷式擬竹

翠幹青枝玉削成，  
脩然誰識此君情。  
根盤澌澌鄱山遠，  
影帶蕭蕭易水清。  
雨潤何妨還改色，  
歲寒能保不渝盟。  
枯松幸託同心久，  
相會無勞問姓名。

和時器擬梅

冰雪生香畫未成，  
相看綽約更多情。  
竹君比玉姿偕美，  
松老如柴骨不清。  
詩詠逋僊甘獨隱，  
譜修范叟愛同盟。  
從來能作和羹用，  
早向商書已識名。

絕飲

平生不能飲常愛能飲人三杯已至醉陶然見天真淺  
飲分數酌夕宴可自晨流連至終席尚可陪嘉賓近者  
患齒痛痛處益有因酒入咽喉間其氣烈且辛遂令痛  
作時難合上下齟齬乃天美祿分定于人身天欲絕吾  
飲何必言諄諄惟令痛及齒不使沾其唇空庭滿冰雪  
寒氣加新春對酒不能飲天意豈不仁不為酒所困庶  
免書諸紳

聞雞

繁星滿春空雞鳴鳴不已試問鳴何為意在喚人起攬  
衣不能眠人各勤所事士人爭入朝商人爭入市惟有  
怠惰人翻嫌聲聒耳殺其善鳴者入庖執刀七雄雞職  
司晨不與牝雞似牝雞鳴聲低豈識司晨理不知家之  
索顧以聲可喜枕上偶聞雞感歎為流涕

新歲與玉汝世賢禹疇濟之為五同會玉汝以  
詩邀飲因次韻時玉汝初治楚獄還

朝班常喜接駕行束髮同遊自故鄉獄事不宛如定國

歸途無險勝王陽三江已隔非吾土五老安知共此堂  
更待城東春色好小園還約看紅芳

書室曉坐

南窗兀坐日光浮殘雪猶看在瓦溝畏冷又過冬一難  
覺衰真合古三休使人強以家書附多事閒將日歷修  
喜報聖躬膺萬福南郊擬從六龍游

二月四日上出視朝志喜

鳳樓高隱五雲端鍾鼓聲傳列奉鑾世道已登三代盛

聖躬常繫萬方安殿前旭日天仍近仗外春風樹不寒  
仰見赭袍陞黼座千官擁笏盡騰歡

是日百官皆具公服朝見

次韻鳴治見懷

層軒孤榻在此地豈吾廬星彩三更滿風威二月初河  
冰清灑灑宮柳翠疎疎詩自昌黎後惟公更押於

郊祀與楊惟立寓宿神樂觀馬道士房

翰林前單多於

此齋宿

僊房地迴步頻移影澹西窗落照遲舊日諸公無在者



新年老友更同誰坐深蠟炬當筵剪聽徹鸞笙隔屋吹  
便欲聯名題壁上郊齋須記仲春時

日煖齋宮賜食頻曲廊連步得楊津卜郊此日非三望

陪祀誰家有四人

楊氏有惟立及大理卿守隨兵部郎中守偶刑部郎中茂仁四人陪祀

展卷鑒書誇茂密

惟立攜宋仲珩書見示

開函投句愛清新

是日李世

賢居元勳皆有詩見投

憶從史局曾相別却向僊房得更親

### 次韻屠元勳陪祀

南郊春半喜新晴盛禮初從改卜行刑獄仍令司寇禁

祝詞先許奉常更

改時維仲春  
陽氣發育

酒傾玉璫分三獻樂奏

簫韶合九成衰病不堪陪祀列仰瞻袍笏羨光榮

送玉汝擢副都御史仍赴南京

南都人識舊清風新命仍歸玉敕中執法星高依北斗  
留臺地重隔江東睢陽會散誰偏老洛下吟成我未工  
欲忘離情須是醉當筵休放酒杯空

園中一鶴長鳴群鳥時噪其旁若相語然因觀  
白集有烏鶴贈答之作輒效其製為四絕或者

能道其意非特所謂自取笑也

烏問鶴

爾脛雖高不上天  
爾軀雖大却枵然  
小園半畝門常掩  
獨舞孤鳴待幾年

鶴答烏

結巢長比鳳如鷁  
阿閣雖高性不貪  
試待明年毛羽長  
一飛直到大江南

鶴問烏

緇裳玄氎不分明  
聒耳爭嫌攫攫聲  
爾自上林能攫食  
如何來此欲通名

烏答鶴

飽食橫飛不願餘  
彈來能避翼能舒  
終年只向空園住  
不會謀身不似渠

謝馮副郎送惠山泉

何處泉滿腹  
惠山橫翠屏  
山遠不能移  
誰移此泓渟  
客從山下來  
遺我泉兩瓶  
磊磊石子在中  
涵數峯青  
宛如

清曉汲尚帶魚龍腥煎茶水有記陸羽著茶經舌端辨  
清濁豈但如渭涇茲泉列第二不甘讓中冷幸蒙蘓子  
詠將詩作泉銘至今山游者爭仰漪瀾亭遠餉踰千里  
甌甌載吳舫後人不好事此事久已停大甕封泥頭所  
重惟醯醢一朝俄得此高屋驚建瓴陽羨茶適至新品  
攢寸莛雖非龍鳳團勝出蔡與丁二物偶相值活火仍  
熒熒蟹眼泡漸起羊腸車可聽煎烹既如法傾瀉散蘭  
馨連飲渴頓解更使塵目醒餅底有餘瀝照見髮星星

嗟此一段奇何意當衰齡不須茶始飲飲水心常惺未  
足酬雅意聊用報山靈

題西戎獻馬圖贈楊應寧都憲督理陝西馬政  
烏駝曉度黃河來蹴踏萬里風沙開四蹄垂鐵不可鑿  
拳毛繞腹非凡材戎人牽過蕭關下毳衣氊帽胡為者  
不辭馳獻到關西聞道楊公來主馬平涼極望水州新  
監苑重開列圉人此正真為渥洼種隱起龍文猶滿身  
馬復令行如詔旨蕃恩應看錦雲比唐家莫說惟毛仲

秦世徒傳有非子內地養馬連長槽料水莖艸民何勞  
楊公一來壯兵氣萬騎逐北天山高匈奴夜撤穹廬遁  
馬政既成公入覲還將此正獻天閑不是按圖空索駿  
應寧示贈行諸作題其後

溽暑不可耐三伏且未闌琳館遙相望出門一何難況  
也值連雨道上不曾乾雨多亦自喜客去幸盤桓試看  
何所得詩卷滿牀攤西行良足慰躍馬過長安仰瞻太  
華峯俯挹黃河湍駉牝散郊野監牧紛奚官嚴霜被百

艸邊城驚早寒懷人當不寐明月中宵看

題米南宮詩墨

靳充道藏

向晚得奇觀案有翰墨陳展卷即可辨迥然出風塵尋  
常勢歆側此幅殊不倫字止五十六端人似垂紳復如  
旗正正又若車麟麟書家有定論俗士妄生嗔不見蘓  
公語超妙仍入神公昔家京口海嶽近為鄰墨蹟多散  
落至寶終難堙譬彼荆山玉旁達見乎尹驚看忽入手  
幸矣歸鄉人百世恐朽敝摹勒須堅珉銘文配瘞鶴終



古焦山垠

為潘時用博士寄壽其叔父鶴溪太守八十

閩南歸老二十年鶴溪先生健如前却杖放步登山巔  
上下與鶴同踰躑眼明不著養生編試問先生何以然  
口碑曾聽閩人傳有守以來公最賢窮簷小民蒙見憐  
舉手加額每祝天願公居家年百千翰林從子今儒僊  
竹林南望歸無緣我為封詩到壽筵和我妙句篇須全  
勿令邠老美獨專

讀蘓集有除夜詩首四句云行年三十九勞生  
已強半歲莫日斜時還為昔人歎蓋述白太傅  
語也後蘓公年止六十五而白公七十六予今  
年六十九適介其間因自賦以寄鄙懷

歲暮日斜三十九更加三十又何如勞生強半蘓終少  
視古猶稀白有餘學士仍兼慚老學書生未敢望尚書  
平生却恨張師德能保虛名不是渠

次韻友人海昌對月見懷

懷僊不信有瀛洲汗漫真為此夜游浮世縱觀俱是海  
高人獨立最宜秋髮晞清露如新沐手挽銀河欲倒流  
却向君家誇故事羽衣明月倚黃樓

寄壽趙完璞八十時得人治盲目復明手書示  
報

憂世非私百畝田上書當道憶當年高歌行野仍三樂  
妙術傳家是十全玉璞獨完雙足在金剛輕刮兩瞳懸  
年開九袞休言老手蹟封題尚宛然

新麪歎

憶昨城西路歸來背夕曛  
芄芄麥未割極目盡黃雲  
黃雲方滿郊都無一日別  
如何盤盂中忽復堆白雪  
乃知昨所見總是闕  
家莊匆匆謀一飽豈似野人忙  
年老重食新感歎繼以泣  
何不遲數朝垂芒滿珠粒

登廣福寺佛閣望西山

城中過坊口時見山一面  
車塵半空起忽復不可見  
今日出城西初喜見山便  
恨當長夏時艸木更葱蒨  
遮胸

如執圭隱首或側弁行行七里餘勝地得僧院仰瞻何  
突兀傑閣俯高殿百級躡層梯身向西闌轉橫絕曠野  
中蒼翠爭自銜已將目力窮却任脛骨顫羣山不知名  
起伏端可辨勢從西南來遙向西北旋萬馬如馳逐陣  
列如鏖戰白雲與碧靄巖姿陡然變誰倩丹青人為我  
展畫卷老至客京華宦遊真已倦若使入山行所歷豈  
能徧一覽青可了無如此中善

次韻謝鳴治初入館修史纂之作

儒官職業敢終辭猶幸相從得故知聖學仰承慚薄識  
史編旁考惑多歧極知古事能為鑑甘比閑工但築基  
四庫大開還自喜老來纔免借書癡

中秋夜與葉翁飲

天淨真如海不波依稀倒影見山河却嫌羣木交加甚  
只恐浮雲點綴多此夜浙江潮湧去年燕地雨滂沱  
一樽更與鄰翁飲老至佳辰肯放過

感范魏公食粥事

長白山中齏粥冷丹陽道上麥舟空故人他日能施惠  
君子當時已固窮

翰林新修工畢適奉命教庶吉士坐久偶成

仰見沉沉畫棟連坐當華屋是何緣朝廷正用儲賢士  
山澤安能置列僊水激長隄聲若瀉日臨高樹影初圓  
自憐老眼渾無見亦愛新涼對簡編

題米南宮水墨圖

閔尚書藏

雲山煙樹總模糊此是南宮鵬突圖自笑頂門無慧眼

臨窗墨蹟澹如無

米自跋云非其頂門上慧眼者不足以識

寄壽施煥伯七十


初從鄉校託交游  
束髮相看到白頭  
我愧濟南非伏勝  
人言吳下有施讎  
高懷已見開三徑  
遺愛猶聞在兩州  
少待登堂成一笑  
手持春酒獻還酬

斫蟹

斫鱸曾有人斫蟹  
始自予蟹也我所欲  
所欲寧舍魚南  
人無不食水族到  
蛭蜍風味覺斯下  
至美當輸渠今歲



美且賤不待霜降初鼎烹本何罪連收同族誅我老齒  
將落兩螯奈偏腴手持但垂涎頗亦晉人如薑醢既登  
案聊問以嘉蔬一斫即可斷大嚼已無餘所恨性不飲  
右手猶自虛晉人定相笑醒然一何愚口腹為小體養  
之愧軻書惟應知味者或取斯言歟



家藏集卷二十九

欽定四庫全書

集部

家藏集卷

三十一

詳校官中書<sub>臣</sub>賈鉉

中書<sub>臣</sub>劉源溥覆勘

總校官進士<sub>臣</sub>楊懋珩

校對官主事<sub>臣</sub>張培

謄錄監生<sub>臣</sub>張永浙

欽定四庫全書

家藏集卷三十

明 吳寬 撰

詩四十九首

詠春雪

燕山春已半寒氣逼窻紗亂撒紛無際平鋪淨少瑕繞  
簷惟作片綴袖不成花紅綻妨桃蕊青抽厄草芽水中  
仍滅沒空裏恣交加向日痕初薄因風勢復斜危牆應

便壓平地總無窪

寒夜懷楊應寧

西望關西更向西度關人去定聞鷄即看萬馬如雲錦  
浪比孤鴻踏雪泥羣牧循行頻檢括連章馳奏自封題  
山城夜坐銷官燭想見霜寒咽鼓鼙

簡鳴治

北望高城樹半遮遙憐孤榻卧官衙新年不見詩循例  
長夜惟知夢到家世道豐亨爭自喜宦途疲憊獨堪嗟

乞身須約同歸去七十于今我亦加

齋居謝屠元勳送解家香

坐來齋閣欲清心忽對名香到夜深已似古人頻掃地  
更無俗客共鳴琴煖煙盤曲絲縈碧細眉圓成著削金  
始信解家真得法清泉餅莫送詞林

與廷式飲時器宅為會

十二月十一日

東街晴雪映朝裾早赴公

閑

席不虛有約只教三友共

重來未及一年餘清談盡日卮言出列坐中堂鼎足如

準擬百篇成別錄新春良會不勝書

時廷式新刻同年三友會錄

再會予家次廷式韻

十七日

休將修禊比山陰一笑荒園欲墮簷量淺不為河朔飲  
曲高難和郢中吟疎林夾戶鶴巢小殘雪當階鶴蹟深  
入夜不須教繼燭吾家海月正浮金

三會廷式公館次時器韻

二十三日

易水東行踏雪埃依然公館向陽開人歌孝友侯誰在  
堂比清虛我復來飲酒不勞三爵戒賦詩真見百篇才

天門半掩歸途晚疑是詞林瀑直回

齋居答廷式

甲子正月五日

手折詩函翰墨香持來知自聚奎堂詩壇未覺三人少  
燈假重期十日長微雪點階添曉色條風入戶動春光  
齋居更喜移居近古樹南邊隔一牆

又喜廷式夜訪

齋居滿座散茶香忽枉肩輿到小堂公事強留三日久  
清談能為一宵長烏金屢熱銷寒氣紅蠟頻燒避月光



却愛兩郎常侍教書聲隱隱過南牆

正月九日再答廷式

齋居解帶坐焚香又見題詩寄草堂  
只尺地連人獨遠尋常春近日初長  
詔嚴北闕聞天語禮盛南郊振夜光  
誰念闕重復命老來猶自走循牆

答胡副使擢廣東

衣繡煌煌映赤墀身依霄漢立多時  
出巡每愛咨民疾遷擢仍看荷寵私  
闕下三年須奏績嶺南一道重分司

遙遙祖德仍相繼此日清名亦畏知

次韻屠元勲李若虛齋居聯句見寄

西署遙瞻每繫心託交常想歲華深  
安能秉興還移棹宜為知音是鼓琴  
老去文場慚曳白春來詩櫝喜分金  
漢家大祀看成禮更擬高才賦上林

送王編修九思歸省

九思字敬夫陝右鄠縣人父母具慶祖母亦存

關陂種樹久成村況話終南正對門  
附郭有山兼有水上堂為子更為孫  
詞林秀發膺清秩春日舒長獻壽尊

兩母白頭誰不戀  
邇來須用答君恩

讀陸參政文量歸田稿

陳塘宿草徧新塋  
別集年來又刻成  
鳳鳥自憐毛羽好  
孤栖終有不平鳴

偶讀司馬溫公詩集  
有和邵堯夫年老逢春三  
首各以本題四字起句  
有感于中輒倣而和之  
年老逢春人共吟  
小園日涉去仍回  
牆邊槐樹是誰種  
籬外桃花特地開  
水到泮時終在沼  
石依陰處自生苔

折腰最苦無筋力欲和淵明歸去來

年老逢春人更狂不登高阜即平岡忘懷每怪言非淺  
好睡還驚夢不長過市塵多如觸霧臨窻花少勝焚香  
長將短髮清晨理又聽鍾聲謁未央

年老逢春人自驚春寒不飲負良朋江南報到猶深雪  
都下聽來無早鶯司馬慣將筇杖策堯夫來挽小車行  
詩成却怪昌黎語凡物鳴因不得平

溫公游園  
常策筇杖

牡丹初開爽奐張幕以護作詩示之

春深喜見一枝紅翠幕高張日正中為語兩郎須記取  
愛身當與愛花同

送劉仁仲歸省

每愛西川玉一雙獨承恩旨到鄉邦長途未畏連雲棧  
勝地終誇濯錦江舊喜文場先入彀近看詩筆已如扛  
那箇春酒秋初熟隔座生香透碧窻

送劉司直展墓

石城挾冊看翱翔好學如君尚未忘譜上劉歆應別派

詩中阮關是同鄉還乘驛傳從恩召每見經幃進講章  
識慕亦知崇似許莫瞻河水歎洋洋

夏夜起坐

病首稜稜卧未便坐臨風露小堂前娟娟缺月初離海  
隱隱明河欲亘天憂旱有詩歌倬彼還家無計歎茫然  
夜深童子垂頭處獨聽城樓刻漏傳

為馬彥中道士題夏太卿雨竹

太卿已逝墨君存筆法依然帶雨痕不識南陽鍊師面

百年遺物屬諸孫

次韻答鳴治病中寫懷

扶杖孱然望北宸，暑風終日自揚塵。  
地連黃閣翻憂遠，疏入銀臺自覺頻。  
身計欲闌還似闕，王言不斷莫如綸。  
白頭相對應相笑，滋味真同苦與辛。

次韻屠元勲以二世誥詞刻石樹先塋之作二首

伐石南山壓厚坤，誥詞考德為求源。  
秦川舊姓真堪數，

浙水清門久自存  
城裏白雲凝遠望  
林間春雨沐重恩  
百年積德終當發  
試看秋臺有孝孫

合德無勞衆口評  
兩篇天語最分明  
秋臺此日生無憾  
巖壑多年死亦榮  
湖水流清環隧道  
鄂山分翠遶羅城  
穹碑屹立高如許  
長表人間罔極情

送文侍御宗嚴奉使河南

盡說文家好弟兄  
更誇仲氏繡衣明  
憲臺此日官為重  
軍政多年例已成  
花下莫辭清酒薄  
津頭遙望畫舸輕



從來練達民間事不負朝廷是此行

為奎姪題畫

林下茆亭坐此翁旋移詩景入胸中江湖日暮多風浪  
應咲張帆使順風

聞趙栗夫擢廣東按察使

嗟我頽衰正乞歸喜君新命出彤闈吳江一水能移棹  
越地千山好振衣學政已成心亦倦獄詞重判手如飛  
却思二十年前事轉覺詩朋座上稀

乞歸不遂

時第三疏以旱災避位為詞蒙御批勉起供職等語

銀臺投疏列三回批答頻驚御筆來過料殘生蒙帝力  
誤居高位召天災老身況復加多病明主何曾棄不才  
恩旨下臨當勉起就令供職已衰頹

五月十五日蒙賜鯇魚二尾

病卧書窗越幾旬朝來猶自食時新江東到此如論價  
須抵盤中二尺銀

盆池養魚

雨來水面似跳珠幸免關魚得共濡只尺洋洋猶自樂  
不知盆外有江湖

病中

勉起難將職再供菴居長夏稱疎慵聊從消遣千行帖  
全仗扶持八尺筇天上雨來蘇病骨溪頭水長滯行蹤  
夜涼忽作江南夢聚塢靈巖紫翠重

為顧良弼題墨梅

芳名曾向譜中傳似見臨溪影倒懸為語游人休亂折

低枝正與雪霜便

次韻李世賢遣祀天壽山禱雨有應二首

禱祠初命禮曹臣  
百里將誠易感神  
周雅累章歌太甚  
漢雩成隊舞何頻  
四郊有地無乾土  
三日為霖絕點塵  
見說陰晴纔倏忽  
下山猶自日華新

北瞻高嶺覆青盆  
雲起橋山勢獨尊  
岱嶽乾封非漢事  
桑林重禱有湯孫  
鮒浮洞徹行千里  
馬去蹄涔散萬村  
清曉朝衣沾濕處  
喜承天寵出金門

次韻世賢和供字韻之作約顧良弼攜酒來慰  
久擬盤餐為客供病中百事歎俱慵髮稀自落如枯葉  
病骨難支低瘦筇老者安居猶費力諸公健步敢追蹤  
黃花酒熟須邀飲佳節遥期九日重

病後獨游園中

八尺筇枝在手中小園游處擬溫公離奇不合翻多壽  
偃偻安能更直躬足弱敢臨堦石亂眼昏渾覺閑花空  
綠陰滿地聞啼鳥此樂何如與衆同

為屠元勳題畫二首

百頃平湖望若空，游人如在水晶宮。日長對此消炎暑，

高閣安能著病翁。

右湖亭  
高士圖

白頭三鳥共稱翁，竝立高枝總下風。何物世間為

閑

俗人，猶自羨三公。

右一雀  
三公圖

世賢以予拒客次前韻復和荅之

自憐杯酒不能供，老病多緣見客慵。開戶出迎難倒屣，  
上堂酬拜定攜筇。預期空挹雲間影，逕造須留竹下蹤。

莫信黃花時節好小園須稱綠陰重

謝顧良弼李世賢攜酒過訪

五月晦

初伏將臨日正長肩輿同約到茅堂遠林忽辱來公子

老杜夏日

李公見訪詩遠林暑氣薄公子過我游

小園翻能致辟疆

吳中有顧辟疆園王獻之徑造

花下扶筇臨

亂石藤陰移席避斜陽幽居無物相延欸綠樹成行晚更涼

世賢謝送鶴雛次韻荅之

短脰宛延類鷺形忍看抱送出前庭詩筒相謝須千首  
園扁曾題只兩翎月下長鳴聲未亮樹間低舞足猶傳

南宮見說多僊侶莫遣羣飛入杳冥

再答世賢過訪之作

病卧空園兩月長何曾延客一升堂忽看棗實真成果  
亂挿榆秧已作疆自喜清陰消伏暑誰期佳節到重陽  
酒酣碧碗深如許不厭冰漿沁齒涼

謝顧良弼送甘州枸杞

畦間此種看來無綠葉尖長也自殊似取珊瑚沉鍊網  
空將薏苡作明珠菊苗同摘憑誰賦藥品兼收正爾須



曾是老人宜服食只今衰病莫如吾

為世賢題唐子華釣舟圖

日落長堤古樹陰漁舟爭放碧溪潯  
看渠共理絲綸手真有前人竭澤心

韓貫道為陳太僕題滁州環山樓末聯有游人  
莫作尋常看李子文章在上頭之句以予嘗作  
樓記也因貫道寄示次韻亦賦一首

山過淮西北地優元龍豪氣正登樓  
松濤繞壑聲如瀉

石竇生雲勢欲浮  
庶子泉清仍弔古  
判官花好不知秋  
憑欄遠瞰孤亭小  
更有文章在下頭

題趙仲穆馬圖

李世賢藏

王孫畫馬兼畫人

闕

神全色不均  
一人汲水來飲馬

一馬欲飲將騰身  
二馬俯首嚙芻蕘  
一人按榭睨樞阜  
天閑不待秋高肥  
一馬不渴二馬飽  
朔方用兵萬騎馳  
三馬竝立如不知

贈謝鳴鑾還台州次李若虛韻二首

鳴治弟

海上三年別故山客中骨肉眼前看行裝自解書千卷  
卧榻聊分屋半間晉代詩才推謝朓嚴陵風節見方干  
翛然不為冠裳累悔不從君學舊閒

京國看

闕

作宦游從來試

闕

未曾投家庭行義存三代

隱逸聲名出九流  
舊節懸車應不改上庠分袂豈無由

幸逢堯舜

闕

巢父依然去飲牛

五同會

日高連步出金閨鄉里衣冠比聚奎  
已幸容予為五一

不勞邀客向東西古人事例

闕

真率流俗杯盤

闕

整齊

白髮蕭然叨坐首敢辭揮筆製新題

西涯示東究紀游諸作有謁顏廟一首予昔謁  
廟未有詩因次韻補之

魯人有東家顏氏非西鄰陋巷帶簪井千載猶荒村古  
屋自增光累代加褒甄繼苦心不違至今里稱仁賢哉  
克復語後生庶前聞宣知簞瓢樂樂道非樂貧我昔過  
其里指途藉居人是時屬炎暑蕭索如初春老樹盡摧

折周垣半顏堙入祠重瞻拜辦香贊明神終退見闕者  
疑為原憲孫泗水清泚淥尼山翠嶙峋落日無以薦悠  
然歌采蘋

詩餘三十四首

詠墨菊

醜奴兒

風枝落葉涼思起占斷東籬愛殺開時只恨王弘送酒  
遲綠衣黃裏詩人句不是相知顏色堪疑新浴羲之  
洗研池

詠木芙蓉

滿江紅

桃李無言悵久與青春相別誰料到秋深依舊紅芳未  
歇亂蕊偏承白露滋榮枝肯被涼風折望耶溪有種二  
名同真比竊桂枝香菊花節月中仙霜下傑試移來  
向老圃為同列寶髻偏非墜馬粧綠裙低為凌波揭歎  
知心惟有一高蟾詩題絕

詠桂花

浪淘沙

節候屬金行花信堪憑鳳釵亂挿綴黃英薦地涼風吹

落地猶作金聲 浴下未知名合喚花卿  
天香不與衆芳爭何事芙蓉遙避去野水盈盈

秋夜對月

大江東去

危樓百尺隱秋蟾微露半規簷角吹滅銀燈聊坐待自  
捲西堂簾幙積雨初收纖雲不起訝星河俱落屋梁光  
滿赴人如有盟約何事李白題詩強分今古有酒宜  
高酌慢撫枯桐三二引寫我一時之樂古樹風回荒階  
蛩語未覺秋聲惡芙蓉花上今夜露華堪濯

翰林齋宿對雪

滿廷芳

官燭全銷朝衣未着簌簌誰打西窗春威猶弱膝六尚  
難降信是春前少見燕市上也復嗶危庭槐白一時點  
綴冰柱倩誰扛齋居當此夜香凝紙帳酒酒銀缸馬  
蹄散空留玉斗成雙郢曲無人傳得詞苑客宜製新腔  
爭如唱柳州佳句蓑笠釣寒江

又和李石城

南鄉子

深院上衣飄誰把風前玉樹搖起望街頭人獨去迢迢



足蹟分明過石橋 近午恨還銷平滿階除待此宵惡  
客猶嫌無酒飲寥寥明日東家折簡招

賀張東海太守致仕

定風波

庾嶺寒梅千樹開 南安太守賦歸來 向晚春風狂捲地  
只有梅花一笑不吾猜 拂袖高臺亦快哉 風月相隨  
直到九峰隈 遙計到時春已暮 白髮蒼顏醉也不曾頹  
酒洌魚肥料得要人陪

答傅體齋約游西山

青玉案

西山於我如無分  
要游時春常盡佳  
向京華凡六閨出  
城偏近山僧笑我  
此事無人信  
故人書札勞相問  
可惜情懷還不順  
冒暑同游游也悶  
湖堤須待杏花疎  
雨吹濕雙吟髻

玉延亭午坐

如夢令

午枕莫教重睡  
亭上老槐垂翠  
暑氣此間消  
一陣好風隨至  
多事多事又過  
菜畦行水

壽費藥軒

臨江仙

此日約翁開七袞人來併賀新年逢恩堂裏鼓填然改  
元聞好語紀事作長編江上扁舟初到也憑將玉季  
書傳買田抽取俸中錢他年如得請一笑兩華顛

和答李世賢慶五十

風入松

一從身作翰林官氣味便酸寒圖書堆裏匆匆過功名  
晚青鏡羞看無事不修年譜有時還上詩壇 外君逢  
卯歲將殘五指屈來完往年難比今年好圍爐處妻子  
團樂新歲行人欲發家書先報平安

又答王濟之

水龍吟

短籬重過詩筒生朝引起東隣興厭歌舊調恭承新約  
年年來慶酌則鄉人不似軒書斯須之敬愧雲路先驅  
老婦當時學舞柘枝腰硬如今細數行年若水流吾心  
不競多謝纍纍珠玉客却將何回贈賴菴居一物堪分  
月兒端正期生子攀月裏最高枝吾言非佞

又答陳玉汝

滿庭芳

三十年前以文為戲把筆曾咎長鬚有繩難繫西日漸

桑榆堪歎鬢都白了，  
兼撚斷，憔悴非吾。今猶健，  
他年見客，回拜要人扶。  
朝來無限恨，白雲零落，  
春草荒蕪。傷情處，  
錦裯當日呱呱富貴，  
非吾願也。松菊畔，  
能保遺軀。吳門去，  
扁舟蕩漾，時復過陳湖。

又答周原已

沁園春

蠟炬銷銀夜，誦新詞，  
美成再來，覺癡年漸長，  
後生可畏。秋籐垂雨，  
春筍驚雷，傳菊堂中夢，  
梅窗裏，兩處尋常，幾  
往回顧。他日竝舟射瀆，  
接履胥臺，命官浪把韓蘇比。

磨竭於人安取哉想共瞻山斗何其重望如開武庫是  
甚高才雪擁藍關風清赤壁落得平生衆手推但持酒  
信人生萬事有命安排

又答孫希說

千秋歲

殘年奇事試看門如市怪壽旦人能記藏鉤今夜樂飲  
酒全家醉春又至銀幡插髻隨兒戲有問吾年紀逢  
五初辭四杜老句坡僊字雕蟲空自苦畫虎難相類始  
知得遽公往事真堪愧

又答朱天昭

賀新郎

分袂嗟何久天一方望美人兮吳趨坊口今日喜重逢  
燕地不見雪花如手正殘冬晴明時候賤子行年剛半  
百征車來帶得閭門酒歌一闕酌三斗況君本出睢  
陽後便如五老來吾壽更把筵中詞客數又合着香山  
九眼底事大都非偶春半報君惟兩語喚小僮急向西  
樓走金榜首題朱某

又答趙栗夫

醉蓬萊

歎平生事業禿筆成堆殘書盈架九載心勞儼陽城書  
下氣力無多頭顱如許向老來誰怕瞻望西山經營東  
圃頻年無暇足馬何來白雲司裏語妙非詩意濃如  
畫世俗相過笑稱觴持帊宜待楓落吳江一句為鄉閭  
增價免管停豪鳳箋留尾試題除夜

又答賀其厚

喜達  
鶯

蓬門朝啓笑委巷荒涼誰施朱榮京國繁華貧居幽僻  
村塢依然堪抵却有三間破屋能作故人客邸稱壽處



吾見其兄若逢其弟 好禮為我再解金龜當槽坊新  
醴狂客如君謫僊非我何事將罇俎洗且復呵開凍硯  
親手探詞源底歲既暮肯謝盧家茶乞顏公米

又答楊君謙二首

大江東去

早年疎懶豈知得到中歲童心猶在五十無聞我預向  
論語篇中高載破研冰堅空壘塵滿此是家常態寒窗  
孤坐悠然徒有深嘅 何事車馬喧闐入門來總是親  
朋察察執雉持魚薦宿醅況有堆盤生菜舉盞相酬適

臘盡春回義和交代老夫哀矣惟君宜自加愛

曲高難和問誰倡此白雪陽春新調須是宗人纔識得  
曹氏碑文之妙蒲柳姿零牛羊齒長得此真堪笑才如  
甕蠹一時綠出成繚 老子親付新郎作長綸便向六  
鰲垂釣波及鯨魚驚昨宵地下髻揚尾掉是夜地震  
故及之病  
眼摩挲看春榜題名靈龜休焦嘗聞人語科場最怕年  
少

苦雨

沈溪  
沙

幾陣南風挾雨飄  
霎時窻外過春潮  
端愁西郭衆山漂  
翠繞玉河牽荇菜  
綠搖金水舞蘭苕  
田中宿麥恐無苗

喜晴 全前

晚來疎雨過柴關  
還我斜陽屋滿間  
東方蟬蛩一河彎  
把筆欲題山宛轉  
枕書高卧鳥綿蠻  
意隨天上白雲間

追和元張伯淳學士贈長蘆彈琵琶者韵一首

木蘭  
花慢

自潯陽客散千古事少風情忽丹穴將雛空山啄木上  
下和鳴誰云不如竹也却千愁萬恨託絲聲好把金龜  
當酒莫將銀甲彈箏玉堂風靜落花輕學士舊曾聽  
想淚濕青衫情纏絲筆沉醉初醒長蘆往時年少悵悠  
然對坐到天明空使後人懷古夜窻快雪時晴

游虎丘

江神  
子

千人石上可中亭僧說法鬼來聽此事休談但愛石峻

增二十餘年身再到頭已白樹猶青  
劍池一道更清  
冷第三名載泉經斜陽啼鳥酒初醒  
小閣半間重徙倚  
蘇子語是詩銘

謝吳中親友

清平樂

金閨亭下舟泊當春夜水底星光光許大風利帆開似  
馬曉來送客忙追不知人在天涯莫謂褰裳宵遁怕  
當人面分離

舟中詠沙燕

憶王孫

身輕不受柳風吹  
小穴藏身託土隄  
隄若崩時穴更移  
免啣泥誰說華堂便好棲

臨清晚泊

柳梢青

畫鷁高飛長河作帶  
細柳成帷晚睡初醒  
棹歌聲起錯認南歸  
清源城郭旁圍望道  
上行人未稀油壁香車  
紅泥細酒故土全非

晚行御河

西江月

隱隱高原碧柳茫茫古岸  
黃沙小舟不見賣魚蝦  
有酒

何曾論價 水杳容腸九曲路迷人蹟三義灘頭茅屋  
兩三家此景畫師休畫

公署冬晚

蝶戀花

落葉滿階吹不去上苑啞啞只有烏爭樹吏散堂空人  
靜處風景嗟如許 時事驚心那忍賦白髮垂垂總是  
愁千縷日隱西山當薄暮扁舟好問江湖路

題修竹士女圖

阮郎歸

嫣然何物步苔茵霞裾誰染塵淡粧一面認來真水邊

非麗人 如抱恨更含顰隔園修竹接東鄰風前忙轉身

題倦繡士女圖 女前

日高碧樹午陰圓繡牀人未眠回文錦字綵絲纏停鍼還悵然飛絮底落花邊青春將暮天遼陽人去幾時還真將詩意傳

題宮人二景二首 重疊金

太湖石畔苔痕滑玉階扶上看明月若比廣寒宮宮中



人又空 夜寒風力重別館簾鉤動為問夜如何松陰  
月正多

離宮複道遙相望步來不設青絲障琪樹列千行更聞  
金粟香 玉奴傳信至上有飛瓊字明日會蓬萊還同  
僊姥來

癸亥歲除自壽

踏莎行

一歲之終吾生之始年稱七字從今起俗說添年是減  
年不添不減即能比 天念疎慵人憐委靡詞林老大

成何事若教歸去更安閒不知活到多年紀

家藏集卷三十